

元

史

七

元

之

一

本紀卷第十九

元史十九

翰林學士賈知制誥修

國史宋濂

翰林待制舉直郎兼

國史院編修官

王禕等奉

勅修

成宗二

二年春正月丙子詔蠲兩都站戶和雇和市已卯詔江南毋捕天鵝以忽刺出千戶所部屯夫貧乏免其所輸租上思州叛賊黃勝許攻剽水口思光寨湖廣行省調兵擊破之獲其黨黃法安等賊遁入上牙六羅壬午太陰犯輿鬼詔凡戶隸貴赤者諸人毋爭甲申命西平王奧魯赤今夏居上都丙戌太白晝見安

西王傳鐵赤脫鐵木而等復請立王相府帝曰去歲
阿難荅已嘗面陳朕以世祖定制諭之今復奏請豈
欲以四川京兆悉爲彼有耶賦稅軍站皆朝廷所司
今姑從汝請置王相府惟行王傳事丁亥太陰犯平
道己丑御史臺臣言漢人爲同寮者嘗爲姦人摺據
其罪由是不敢盡言請於近侍昔竇赤速古而赤中
擇人用之帝曰安用此曹其選漢人識達事體者爲
之以御史中丞禿赤爲御史大夫庚寅太陰犯鈞鈴
辛卯令月赤察而也可及合刺赤所部衛士自運軍
糧給其行費甲午授嗣漢三十八代天師張與材太

素疑神廣道真人管領江南諸路道教乙未詔諸王
公主駙馬非奉旨毋罪官吏賜諸王合班妃鈔千二
百錠雜幣帛千匹駙馬塔海鐵木而鈔三千錠回紇
不刺罕獻獅豹藥物賜鈔千三百餘錠二月己亥朔
中書省臣言陛下自御極以來所賜諸王公主駙馬
勲臣爲數不輕向之所儲散之殆盡今繼請者尚多
臣等乞甄別貧匱及赴邊者賜之其餘宜悉止從之
分江浙行省軍萬人戍湖廣給稱海屯田軍農具詔
奉使及軍官歿而子弟未襲職者其所佩金銀符歸
于官違者罪之辛丑立中御府以脫忽伯唐兀並爲

中御卿丙午禁軍將擅易侍衛軍蒙古軍以家奴代役者罪之仍令其奴別入兵籍以其主資產之半畀之軍將敢有縱之者罷其職括蒙古戶漸丁以充行伍丁未太陰犯井庚戌詔軍卒擅更代及逃歸者死給禿禿合所部屯田農器丙辰詔江南道士貿易田者輸田商稅庚申命札刺而忽都虎所部戶居于奉聖雲州者與民均供徭役自六盤山至黃河立屯田置軍萬人丙寅以大都留守司達魯花赤段貞爲中書平章政事遣使代祀嶽瀆賜安西王米三千石以賑飢民三月壬申以中書平章政事不忽木爲昭文

館大學士平章軍國事罷太原平陽路釀進蒲萄酒
其蒲萄園民恃爲業者皆還之諸王出伯言所部探
馬赤軍懦弱者三千餘人乞代以強壯從之仍命出
伯非奉旨毋擅徵發以怯魯刺駐夏民飢戶給糧六
月郡王慶童有疾以其子也里不花代之賜八撒火
而忽荅孫禿刺三人鈔各千錠治書侍御史萬僧受
賊命御史臺與宣政院使荅失蠻雜治之癸酉增駐
夏軍爲四萬人忻都言晉王甘麻剌朶兒帶言月兒
魯皆有異圖詔樞密院鞠之無驗帝命言晉王者死
言月兒魯者謫從軍自效詔雲南行臺檢劾亦乞不

薛宣慰司案牘甲戌遣諸王亦只里八不沙亦憐真也里慳甕吉刺帶並駐夏于晉王怯魯刺之地丙子車駕幸上都丁丑以完顏邦義納速丁劉季安妄議朝政杖之徒二年籍其家財之半甲申次大口乙酉太陰犯鈎鈴辛卯賜遼陽行省糧三萬石壬辰詔駙馬亦都護括流散畏吾而戶癸巳湖廣行省以叛賊黃勝許黨魯萬丑王獻于京師賜諸王鐵木兒金二百五十兩銀二千五百兩鈔五千錠以旌其戰功以合伯及塔塔刺所部民飢賑米各千石夏四月己亥朔命撒的迷失招集其祖忙兀臺所部流散人戶賜

諸王八卜沙鈔四萬錠也真所部六萬錠平陽之絳
州台州路之黃巖州饑杭州火並賑之五月戊辰朔
免兩都徭役辛未安西王遣使來告貧乏帝語之曰
世祖以分賚之難嘗有聖訓阿難荅亦知之矣若言
貧乏豈獨汝耶去歲賜鈔二十萬錠又給以糧今與
則諸王以爲不均不與則汝言人多飢死其給糧萬
石擇貧者賑之甲戌詔民間馬牛羊百取其一羊不
滿百者亦取之惟色目人及數乃取丁丑太陰犯平
道庚辰土蕃叛殺掠階州軍民遣脫脫會諸王鐵木
而不花只列等合兵討之甲申命也真薛閣罕駐夏

于合亦而之地禁諸王公主駙馬招戶已丑詔諸徒役者限一年釋之母杖庚寅罷四川馬湖進獨本葱詔諸王駙馬及有分地功臣戶居上都大都隆興者與民均納供需丁酉命諸行省非奉旨毋擅調軍安南國遣人招誘叛賊黃勝許也黑迭失進紫檀賜鈔四千錠是月野蠶成繭河中府之猗氏霍太原之平晉獻州之交河樂壽莫州之莫亭任丘及湖南醴陵州皆水濟寧之濟州螟六月己亥給出伯軍馬七千二百餘匹詔晉王所部衣糧糧以歲給衣則三年賜之給瓜州沙州站戶牛種田具御史臺臣言官吏受

賂初既辭伏繼以審覈而有司徇情致令異辭者乞
加等論罪從之乙巳太白犯天關以調兵妨農免廣
西容州等處田租一年丙午叛賊黃勝許遁入交趾
甲寅降官吏受賕條格九十有三等丁巳太白犯填
星癸亥太陰犯井丙寅詔行省行臺凡朱清有所陳
列毋輒止之賜西平王奧魯赤銀二百五十兩鈔六
千錠所部六萬錠諸王亦憐真所部二十萬錠兀魯
思駐冬軍三萬錠是月大都真定保定太平常州鎮
江紹興建康澧州岳州廬州汝寧龍陽州漢陽濟寧
東平大名滑州德州蝗大同隆興順德太原電海南

民饑發粟賑之秋七月庚午肇州萬戶府立屯田給以農具種食辛未以鈔十一萬八千錠治西蕃諸驛甘肅兩州驛戶饑給糧有差賜諸王完澤印癸酉詔茶鹽轉運司印鈔提舉司運糧漕運司官仍舊以三年爲代雲南福建官吏湍任者給驛以歸壬午填星犯井太白犯輿鬼括伯顏阿朮阿里海牙等所據江南田及權豪匿隱者令輸租河泊官歲入五百錠者勅授增江西南南省叅政一員以朱清張瑄爲之授特進上柱國高麗王世子王諤爲儀同三司領都僉議司事乙酉遣雲南省逃軍戍亦乞不薛命湖廣江

西兩省擇駐夏軍牧地丙戌遣岳樂也奴等使馬八
兒國己丑命行臺監察御史鈎校隨省理問所案牘
以虎賁三百人戌應昌諸提調錢正官其部凡有逋
欠者勿遷叙廣西賊陳飛雷通藍青謝發寇昭梧藤
容等州湖廣左丞八都馬辛擊平之辛巳賜貴由赤
戌軍鈔三萬九千餘錠是月平陽大名歸德真定蝗
彰德真定曹州濱州水懷孟大名河間旱太原懷孟
甯福建廣西兩江道饑賑粟有差八月丁酉朔禁舶
商毋以金銀過海諸使海外國者不得爲商庚子太
陰犯亢太白犯軒轅壬寅命江浙行省以船五十艘

水工千三百人沿海巡禁私鹽癸卯太陰犯天江乙巳詔諸人告捕盜賊者強盜一名賞鈔五十貫竊盜半之應捕者又半之皆徵諸犯人無可徵者官給乙卯太陰犯天街太白犯上將給諸王亦憐真軍糧三月是月德州彰德太原蝗咸寧縣金復州隆興路隕霜殺禾寧海州大雨大名路水九月戊辰太白犯左執法辛未聖誕節帝駐蹕安同泊受諸王百官賀壬申太陰掩南斗甲戌增鹽價鈔一引爲六十五貫鹽戶造鹽錢爲十貫獨廣西如故徵浙東福建湖廣夏稅罷民間鹽鐵爐竈給襄陽府合刺魯軍未賜田者

糧兩月罷淮西諸巡禁打捕人負丁丑太陰犯壘壁
陣戊寅元江賊捨資殺掠邊境梁王命怯薛丹等討
降之甲申雲南省臣也先不花征乞藍拔尾農開陽
兩寨其黨荅剌率諸蠻來降乞藍悉平以其地爲雲
遠路軍民總管府己丑太陰犯軒轅辛卯諸王出伯
言汪總帥等部軍貧乏帝以其久戍命留五千駐冬
餘悉遣還至明年四月赴軍甲午令廣海左右兩江
戍軍以二年三年更戍海都兀魯思不花部給出伯
所部軍米萬石是月常德之沅江縣水免其田租河
間之莫州獻州旱河決河南杞封丘祥符寧陵襄邑

五縣冬十月丁酉有事于太廟壬寅發米十萬石賑
糴京師以宣德奉聖懷來縉山等處牧宿衛馬甲辰
修大都城壬子車駕至自上都職官坐賊經斷再犯
者加本罪三等贛州賊劉六十攻掠吉州江西行省
左丞董士選討平之是月廣備屯及寧海之文登水
十一月丁卯以蠻洞將領彭安國父子討田知州有
功賜安國金符子爲蠻夷官荅馬刺一本王遣其子
進象十六戊辰以廣西戌軍悉隸兩江宣慰司都元
帥府己巳兀都帶等進所譯太宗憲宗世祖實錄帝
曰忽都魯迷失非昭睿順聖太乙所生何爲亦曰公

主順聖太后崩時裕宗已還自軍中所紀月日先後
差錯又別馬里思丹砲手亦思馬因泉府司皆小事
何足書耶辛未徙江浙行省拔都軍萬人戍潭州潭
州以南軍移戍郴州以洪澤芍陂屯田軍萬人修大
都城遣樞密院官整飭江南諸鎮戍軍凡將校勤怠
者列實以聞增海運明年糧爲六十萬石丁丑太陰
犯月星又犯天街庚辰太陰犯井丁亥太陰犯上相
乙酉樞密院臣言江南近邊州縣宜擇險要之地合
羣戍爲一屯卒有警急易於徵發詔行省圖地形覈
軍實以聞戊子太陰犯平道贈大都巡防漢軍壬辰太